

Ilinniagaqarnersiutit pillugit Inatsisartut inatsisissaannut siunnersuut**Akissuttitut allakkiaq**

(Ilinniagaqarnernut Ilisimatusarnernullu Naalakkersuisoq)

2. Suliarinera

Aallaqqaasiullugu Naalakkersuisut Kultoreqarnermut, Ilinniartitaanermut, Ilisimatusarnermut Ilageeqarnernullu ataatsimiitaliaq qujaffigerusuppaq siunnersuut pillugu peqqissaartumik sulisimaneranut aamma aappassaanneerneqarnissaanut isumaliutersummut.

Ataatsimiitaliap ataatsimoortup isumaliutersummini inassuteqaatigaa ullumikkut aaqqissuussineq inatsisartut aningaasanut inatsimmi oqaasertaliinikkut ilinniagaqarnersiutit aningaasartaanik ukiumoortumik naliliisarnerat nalimmassaasarnerallu ingerlatiinnarneqassasoq. Ilanngullugu ataatsimiitaliap isumaliutersuutaani erserpoq Ataatsimiitaliap inassuteqaatigigaa ullumikkut ilinniagaqarnersiutinik akilersuinermi tapiiffigineqarnissamut nunap sortaani najugaqarneq apeqqutaatinneqqarunnaassasoq.

Kiisalu Ataatsimiitaliap inassuteqaatigaa siunnersuutip pingajussaaneerneqarneranut atasumik akuersissoqassasoq, Naalakkersuisut Ataatsimiitaliap inassuteqaatai malillugit allannguutissanik siunnersuuteqareererpata.

Ataatsimiitaliap isumaliutersuuta misissorluareerlugu, minnerunngitsumik Ataatsimiitaliap tunngavilersuutai, Naalakkersuisut aalajangersimapput Ataatsimiitaliap inassuteqaatai malillugit allannguutissatut siunnersuuteqarniarlutik.

Taamatut oqaaseqaateqarlutik Naalakkersuisut inassuteqaatigaat siunnersuutip pingajussaaneerneqarnerani allannguutissatut siunnersummi imarisaasut ilanngullugit siunnersuut inaarutaasumik akuersissutigineqassasoq.